


LESSON 9

*February 24 – March 1

Topa' Min tawh Hongpai Pa-in Thupha Ngah taken



SABBATH NITAAK

Tu Kaalsung Simding: Late 23; Johan 10:11–15; Late 22; 89:27–32; Kol. 1:16; Late 2; Heb. 7:20–28.

Kamngah: “Inn lamte in a nilkhiat suang pen inn kiu suang bulpi suakta hi. Hihpen Topa’ nasepna hi-a, eite’ mit ah lamdang hi” (Late 118:22, 23).

L ate in Khrih nunzia le a nasepte a pulaak hi. Hotkhiatna nasep khempeuh Late sungah kimu thei hi. Khrih nunzia le a nasepnate lampi tuamtuan tawh kipulaak hi. Tua bangin a gen kholh bang mahin tangtung takpi hi; a pellem bang mah om lo hi. Khrih in Pasian ahihna, Pa sawl mangin hong nuntakna, Pasian biakinnpi ading a lunghimawhnate, Amah in Tuucing Hoih Pa ahihna le langpanna thuakin lehhekna thuak ding ahihna, a guh a tang kitan lo ding, sihna thuakin, sihna zo-in thokik ding ahihna cihte banah van a kahna, siampi sem ding le ukna nei-in Kumpi hi ding ahihna cihte zong kipulaak hi. Zeisu in mihingin hong pianma kum tul tampi val bangin kigenkhon khin hi. Tua hi-in Ama nasepna i pulaak ciangin Zeisu in Late pulaak thute mah siksarin thu a hilh hi. Nungzuite tawh kihoin Emmaus khualam zuanin a pai-na lampi-ah amaute tawh kihoin a pai uh hi (Luka 24:44).

Late Bu sung pan kim khat in Khrih nunna-ah a tangtunna kimu thei hi (Late 24, 45, 72 le 101) Zeisu in Kumpi le Thukhen Mangpa ahihna a pulaak uh hi. Late 88 le 102 in Pasian silate thungetna le gimthuakna thute a pulaak hi. Late buppi in Late gelhpa dahna kahnate, lungdam kohna, Pasian min phatnate le Topa in thutanna tawh a galte tungah thu a khensak ding ngetna a kipan suahtakna a ngah nading, cihte kimu thei hi. Hih thute in mawhneite a hong hotkhiat nadingin Zeisu thuak khak thute hi, ci-in i thei hi.

*March 2, Sabbath a ding kiginkholhna in tu kaal lesson sim in.

A Nuntakna Hongpia Vantung Tuucingpa

Simin, Late 23; 28:9; 80:1; 78:52, 53; 79:13; le Late 100:3. Koi bangin Topa in a mite tawh kizopna nei hi, ci-in pulaak hiam?

Topa in Tuucing bangin hong kipulaak a, Pasian mite in Ama kepna ngah uh hi; Tuucing Pa in tuute a cin a kep bangin Topa in a mite hong kem hi; a mite hong khualin i kitangsapna khempeuh hong sik hong pia ahihna kimu thei hi. Eite in i sapna khempeuh adingin Amah i muang thei hi. Tuucing cih limciinna in Pasian le a mite in kinai takin kizopna a pulaak limciinna khat hi. Banghang hiam cihleh Tuicingte in a tuute uh kemin khoi-in don uh hi. Tuute kisapna don lo-in om lo hi. Tuucing cih limciinna in Pasian in eite hong nei-in hong kem ahihna honghilh hi. Tuabangin a hong kepna-ah thu nih kimu thei hi; piensakna (*Late 95:6,7; 100:3*) le thuciam (*Late 28:9; Heb 13:20*).

Tuicing limciinna in tuicing in a tuute a makaih bangin vantung Tuicing Pa in Joseph a makaih hi (*Late 80:1*) Jacob in Joseph thupha a piakna-ah Pasian in Israel mite Tuicing Lianbel Pa hi, ci honghilh hi. Ama cinna kepna sungah na khempeuh kicinna a om hi (*Pian. 49:24*). Tuicing pa in a tuute a kep bangin Kumpipa in a mite hong kem hi (*2Sam. 5:2*). Hi mah taleh Pasian bek in Tuicing cih min ngah dingin a kilawm hi. Bang hang hiam cihleh leitung kumpite in tua bangin kicinna neilo uh hi. Zeisu bek in tua bang kicinna a nei hi. Tua hangin amah pen Tuicing Hoihpaa ci-in kiciamteh hi.

Simin, Johan 10:11–15. Zeisu in Tuicing Hoih Pa ahihna thu bang kipulaak lak hiam?

Vantung Tuicing Pa le A tuute in kinai takin kizopna nei hi; zi le pasal bangin kizopna nei uh hi. A tuute in Tuicing Pa aw za-in zui uh hi (*Johan 10:4, 27*). Tuute in tuicing pa aw a khentel thei hi. Tuicing pa in ama tuucinte le midangte tuute a khentel thei uh hi. Ama aw za-in a zui tuu in ama tuucin hipah hi. Khat veivei ciangin Pasian cin Tuute in gimna tuamtuan a tuah uh ciangin Tuicing Pa in zong na a sakpih hi; Pasian kepna ngah nawnlo ahih manun tua bangin gimna a thuak uh hi. Ahizongin Tuicing HoihPa in a tuute a nusia kei hi. A tuute don dingin a zong hi. Hih in Pasian le a mite kizopna a pulaak hi. A tuute adingin a nuntakna pia dingin a kiging hi (*Johan 10:11, 15*); tua hi napi Amah in a tuute tangin biakpiakna-ah a hong kipia hi (*Johan 1:29*). Zeisu in a Tuute tuuhuang sungah hong sam hi; a tuute hong gawmkhawm hi (*John 10:16*).

Nisim nuntak khuasakna-ah bangci bang lampi tawh Tuicing Hoih Pa hong kepna ngahin Ama kamciamte nuntakpih thei ding i hiam?

Gimthuak Messiah

Simin, Late 22 le 118:22. Koi bangin hon dingin a hong pai Messiah amaute bawlsiatna hong thuak hiam?

Late bu tampi in Messiah in gimna thuak ding ahihna genkholhna nei hi (*Late 42; 88; 102*). *Late 22* in Messiah hongpai ding ahihna thu kician takin pulaak hi. Banghang hiam cihleh *Late 22* in kumpi David thu a gen nuam hilo hi; Khrih hong sihna ding thuhilhna hizaw hi. Zeisu in Singlamteh tung pan *Late 22:1* siksanin thugetna nei hi (*Matt. 27:46*). Khrih in Pa tawh kikhenna thuakin gimna lianpi hong thuak hi. Leitung mawhna vangik a hong pua hi. Khrih in Pa tawh pumkhat ahihna in nusia-in Amah guakin gim hong thuak hi (*Johan 1:1, 2; 10:30*). Tua bangin gimthuak himah taleh Pa le Tapa pum khat hihna a beimang kei hi. Tua bangin Khrih in Pa nusiatna thuak kisa-in a om laitakin Ama nunna khempeuh Pa tungah a kipum ap thei veve hi. Gimna lianpi thuak himah taleh Pa ompihna a phawk veve thei hi.

“Khrih in eite thuak ding mawhna thaman a hong puakkhiatsak hi; leitung mawhna Ama tungah a kisuan hi. Amah in mawh nei mi khatin ciaptehna a hong thuak hi. Mawh sakna panin suahtakna a hong pia hi. Adam suan le khak mihing khempeuh tungah mawhna hong tung hi. Mawhna hangin Pasian hehna in mihing khempeuh tungah hong tung hi; mawhna hangin hehna Tapa in hong thuak hi.”—Ellen G. White, *The Desire of Ages*, p. 753.

Mawhna hangin bawngtalte, humpite, uite in mihingte bawlsiatna thuak uh hi; Khrih tungah siatna, thahna dongin a tun uh hi. Genkholhna bangin Khrih in mihonpite simmawhna, zahpihna a hong thuak hi (*Late 22:1, 8; Matt. 27:43*). Galkapte in Zeisu puan a hawm uh hi (*Late 22:18; Matt. 27:35*). Tua “***suang***” thu a thei mi tawmno khat bek om hi;amaute nilkhiat suang in innkhuam-suangpi hong suak hi; hun khat lai-in a nil khat uh suang himahleh inn kip nading suangpi hong suak hi. Amaute belh dingin munkip hong suak thei hi (*Late 118:22*). Messiah in mihing khempeuh a Honkhia Pa hong suak hi; sihna hong thuakin sihna pan a thokik hi (*Matt. 21:42; Sawl. 4:10–12*). Khrih in mihingte nawlkhinna hong thuak himah taleh Pasian in Tapa vangliatna a ngah hi; Pa in Tapa innkhuampi a suaksak hi (*Efe. 2:20–22; IPet. 2:4–8*). Hih Suangpi a nil khempeuh in Pasian hong hotkhiatna a nial uh hi. Hih thu hangin amaute in thukhenna a thuak ding uh hi (*Isa. 8:14; Matt. 21:44*). Zeisu in singlamteh tungah mawhnei mihing khempeuhte adingin mawhna thaman tawntung sihna a hong thuak hi.

Khrih in tua bangin gimna sihna a hong thuakna hangin na nunzia bangci bangin hong khel hiam? Bang hangin mawhna in kihhuai mahmah hiam?

TUESDAY

February 27

Tawntung ading Thuciamna ah Citakna

Simin, Late 89:27–32; 38–46 le 132:10–12. David thuciamna in bang thu hiam? Bang lauhuai- kihel hiam?

David thuciamna sungah David le a suan le khakte tungah Pasian kamciam kihel hi; Pasian mite nopsak nading zong kihel hi (*1 Sam. 7:5–16; Late 89:1–4, 19–37; 132:12–18*). Tua thuciam a kip tawntung theihna in Pasian in a kamciam tungah citakin David in zong Pasian tungah a citakna tungah kinga hi. Tua hi-in a kipia kumpi, David bangin, Topa tungah citak khin zo lo hi hang. *Late 89* in David thuciam in mangthang ahihna thu pulaak hi. Israel in lamet neilo-in Pasian nusiatna thuak ahi hiam? Tua bang hilo hi. Pasian hehna in thukhenna tungtawnin kimu thei hi (*Late 38:1; 74:1*). Ahizongin tua thuciam in a tawntungin mangthang lo hi. Pasian hong itna in eite tungah hong tungtung lai hi. Mawhna kisikin mawh mai ding i nget ciangin Pasian in mawhnate hong maisak hi. Pasian in a mite tungah lungkim lo-in mawhna hangin mihingte in khialhna sungah nungta uh hi. Mihingte in Pasian sawl bangin nungtalo ahihna uh kiphawkin mawhna hangin bangzahin siatna sungah nungta uh ahihlam kiphawk theikik uh hi (*Late 89:38–46*). Amaute in “*Bangtan vei*” gim thuak lai ding ka hi uh hiam? ci-in dotna nei uh hi (*Late 89:46*). Amaute in Pasian cihtakna sungah lametna neikik thei uhhi; Ama hehpihna a phawk theikik uh hi (*Late 89:47, 50*). A tomin pulaakding hi lehang, Pasian thuciamna sungah mihingte zong kihel hi mah taleh akikhel ngeilo Pasian thuciamna, Messiah tungtawnin i ngah hi. Messiah in Israel mite le namdang khempeuh in Ama sungah hotkhiatna i ngah thei hi. Hih in a tawpna-ah Pasian deihna tangtung ding hi; Ama tawntung gam in kip tawntung din hi. Zeisu hang bek tham lo-in Pasian mite hangin Zeisu Khrih in David tapa le Messiah hi, ci-in i sang hi (*Matt. 1:1; Heb. 1:8*). Amah in pianساك na khempeuh lakah ta upa hi, cihna a ngah hi (*Kol. 1:15*) Hih thu mah *Late 89:27* in zong pulaak hi; hih munah David in Khrih limcing ahihna, ta upa ahihna zong hong hilh hi. “Amah in ka tapa upa belin ka bawl hi; a sang penpen kumpi hihna ka pia hi. “Ta upa” cih thu in David piankhiatna pulaak hi lo hi. Bang hang hiam cihleh David in a unau sungah tapa giatna hi (*1 Sam. 16:10, 11*). Zeisu zong tua bang mah hi. Hih minte in Zeisu pahtawi-na ngah ahihna le ukna nei ahihna hong hilh hi (*Kol. 1:16, 20–22*). Pasian in Zeisu pen leitung Kumpi-in koih a, sihna panin a nungta kik sak hi (*Sawl. 2:30, 31*).

Kolose 1:16, 20–22 simin. Hihin Zeisu hihna bang pulaak hiam? Ei’ ading a nasepna bang pulaak hiam? Bang kamciam hong pia hiam?

Tehpih omlo Tawntung Kumpipa Vangliatna

Simin, Late 2; 110:1–3; 89:4, 13–17; le Late 110:5, 6. Hihte in Zeisu in Kumpi ahihna bang hong hilh hiam?

Pa Pasian pen Messiah in zong Pa ci-in pulaak hi. Kumpipa in Pasian kamciam sungah kihel hi (*Late 2:7; 89:26–28*). *Late 2:7* in Khrih thawhkikna le vangliatna ngahin pahtawi-na a ngahna thu pulaak hi. Hihin tawntung thuciamna le Khrih in Kumpi tokhom tungah mangin siampi nasep a sepna thu zong kipulaak hi (*Sawl. 13:33–39; Heb. 1:5; 5:5*). Tmessiah in Pa ziat lamah tu-in ukzawhna le pahtawi-na a ngah hi (*Late 110:1; Sawl. 7:55, 56*). Topa le “sathau” nilh ngah pa (*Messiah*) in kizopna lianpi nei hi. Hihthu in David suan panin Messiah hong khangkhia ahihna, tua Messiah in Topa mah hi, cih thu honghilh hi. Topa in Messiah hi; tua hi-in Topa in Messiah ahihna kimu thei hi (*Late 110:1, 5*)”—Jacques Doukhan, *On the Way to Emmaus* (Clarksville, MD: Lederer Books, 2012), pp. 26, 27.

A tawpna-ah Khrih in a galte khempeuh tungah zawhna angah ding hi. A galte khempeuh a khe nuai-ah a koih ding hi, cih limciinna in Nidang kumpite in a galte uh manin a khe nuai-ah koih uh hi. Hihin galte tungah zawhna limcing hi. Tuahi-a Khrih sik ciangkhut in lau-na limcing hilo hi (*Late 2:9; 110:2*). Sik “*ciangkhut*” in minam makaite ukna limciinna-in kizang hi (*Gam. 17:2–10*). Khrih ciangkhut in Zion panin hongpai hi-a, tua in Zion a om Pasian mite limciing hi. Ama ciangkhut in a thukhenna limciing hi. Tua in siatna khempeuh tungah zawhna limciing hi; na khempeuh tungah Khrih ukna a pulaak limciinna khat hi (*Mang. 2:27; 12:5*). A gilo kumpite in mawhna kisik kik a, Messiah tungah kipia dingin hunpha kipia hi (*Late 2:10–12*). *Dan. 7* sungah zong Khrih in tawntung a zawhna thu kipulaak hi. Hihthu in thukhen na khit ciangin mi siangthote tungah Sangpen Pa maipha kipiakna thu kipulaak hi (*Dan. 7:22*); Ama ukna gam in hong kiphut hi. Ama ukna in tawntungin a kip ding hi (*Dan. 7:27*). Singlamteh tunga Khrih hong sihna hangin tua ukna Gam in a kip tawntung Gam hiding hi. Kumpipa tungah muanna neite tungah tua kamciam kipia hi. Messiah ukna le Ama dikna sungah a nungta mite in nopsakna tawh a kidim uh hi (*Late 2:12; 89:15–17*).

A tawpna-ah siatna tungah hoihna in zawhna ngah ding ahihna thu theihtelna in bangzahin lungdam huai hiam? Tua hun ciangin na khempeuh in thutanna tawh kidim ding a, gimna le hingimna khempeuh beimang ta ding hi. Koi bangin hih thu in khamuanna hong pia hiam? Siatna tungah zawhna hong tung ding hi, cih thu in eite khamuanna hilo hiam?

Melchizedek Khanggui zui-in Tawntung Siampi

Simin, Late 110:4–7. Koi bangin Khrih siampi hihna in thupi hiam?
Vantung biakbuk sunga Khrih siampi nasepna hangin lametna lian bang kimu thei hiam?

Pa Pasian in Messiah tungah tawntung kumpi hihna a guan hi (*Late 110:1–3*) siampi hihna in liatna tawh kidimin Melchizedek khanggui panin ukna nei hong suak hi (*Late 110:4–7*). Topa in A Kammal ciaptehna pia hi (*Heb. 6:18*). Pasian in kicinna tawh a kidim Siampi hihna thupha a pia hi; tua in hehpihna tawh a tonkhawm hi. Mihingte mawhna le langpanna hangin Pasian in a mite a nunghei hi. Pasian kamciam in kikhel ngeilo hi. Ama hehpihna in nasemin a kisik mite tungah thukhenna a hong tung hi (*Pai. 32:14; Late 106:45*). Pasian kamciam in David tungah kipia thuciamna-ah Messiah in Kumpi le Siampi ahihna pulaak hi (*Late 110:4*). Israel kumpite in Levi siampi sem ngeilo uh hi (*Gam. 8:19; 2 Khang. 26:16–21*). *Late 110* in Messiah in Kumpi ahihna thu honghilh hi. Amah in Israel kumpite le siampite tawh kibanglo hi. Tawntungin siampi hihna nei Khrih in Melchizedek khanggui panin a luah suah hi; Melchizedek in Salem (Jerusalem) kumpi le Sangpen pa Siampi hi (*Pian. 14:18–20*). Thukhun Lui in Kumpi David ahih keileh Israel kumpite in Melchizedek suan zui-in siampi sem kuamah om lo uh hi (*Late 110*). Late in kumpi ukna nei-in siampi nasepna tawh thuahkhawm ahihna kician kitel takin honghilh hi.

Simin, Hebrew 7:20–28. Khrih siampi hihna panin bang thu nuntakpih ding honghilh hiam?

Vantung Kumpi le tawntung siampi hihna tawh Khrih in Levi siampite le kumpite tawh tehkak zawh ding hilo hi; hih in lametna hong guan hi. Khrih in a siangtho thuciamna tawisang hi; Pasian thuciamna hi-in mihing kamciam te hilo hi. Amah in van biakbuk ah siampi hihna nei hi. Ama siampi sepna in mawhna, sihna in sukhalo hi. Amah in a mite honkhia bekthamlo-in amaute adingin mawh thuumna a nei hi. Khrih nasepna in kicinna tawh kidim hi; Amah in hehpihna, lai-natna tawh kidim hi. A mite tungah tawntung khamuan na hong guan hi (*Heb. 6:19, 20*). Khrih siampi hihna in siatna le mawhna khempeuh a beimangsak ding hi. Mihingte lungsim sung pan bek tham lo-in vankhuanuai khempeuh panin zong a beisak ding hi. Amah in *Late 2* pulaak kamciamte a tangtungsak ding hi. Ukna nei kumpi khempeuh in Khrih ukna nuai-ah om ding uh hi (*Late 2:6–9; 110:1, 2, 5, 6*). Zeisu siampi hihna in lamdangin Ama sawlna mang ding le Amah bek mah muan ding hong kal hi.

Ngaihsutbeh Ding: E. G. White, *The Desire of Ages* laimai 19-26 sung “God with Us” simin.

Khril thungetna le Khrih tungah negetnate in hothiatna tawh kipawl, “Eite tawh hong om khawm Pa” ahihna le eite hong honkhia Pa ahihna kimu thei hi (*Matt. 1:23*). Zeisu cih a khiatna in “Pasian in ei tawh hong om khawm hi. Mihingte nawlkhinna leitung gimnate a hong thuak hi. Amah in “Pasian in ei tawh hong om khawm hi” cih thu in thutanna le suahtakna ngah ding kahna awging hi. Amah in eite adingin Tawntung Siampi le Kumpi hi-in, tawntung siatna panin a hong kaikhia hi. Khrih sungah Pasian kamciam suahtakna kicing om hi (*2Kor. 1:20*). Ellen G. White in hih bangin Khrih in mihingte tawh pumkhat hong suahna pulaak hi: “Khrih in mihing hong suahna tawh mihing nunna hong nei hi; Pasian ahihna tawh Amah in Pasian tokhom a luah hi. Mihing Tapa ahihna tawh Amah in thu zuihna-a eite etteh thamcing hi. Pasian Tapa hihna tawh Amah in Ama sawl man zawhna tha hong guan hi. Sawlbawk sung panin Moses tungah “Keimah in Keimah kahi hi” ci-in pulaak Pasian in Khrih mahmah hi. Israelte tungah “Note hong sawl khia Pa in Kei mah ka hi hi” ci-in na pulaak ding uh hi (*Pai. 3:14*). Hih in Israel mite suahtak ngah nading thuciam hi. Amah in Mihing bangin hong nungta hi. Bethlehem panin a khangkhia naungek in kiniamkhiatna le nunneem Honpa in mihingin hong nungta Pasian ahihna kimu thei hi (*1 Tim. 3:16*). Eite tungah Amah in “Keimah in Tuucing Hoih kahi hi.” “Keimah in Nuntakna an kahi hi.” “Keimah in lampi, thuman le nunna kahi hi.” “Vangliatna khempeuh kei tungah hong kipia hi.” *Johan 10:11; 6:51; 14:6; Matt. 28:18.* “Keimah in khamuanna kong pia hi. Keimah in lau-na bangmah ka nei kei hi.”—*The Desire of Ages*, pp. 24, 25.

Kikupding Dotnate:

- ① Koi bangin Pasian in A mite tungah a bei ngeilo Ama cihtakna kimu thei hiam? Gimna a thuak mi in Pasian kiang pan khamuanna tawh a nungta thei ding hiam?
- ② Koi bangin Melchizedek gui zui-in Khrih siampi hihna in Levi siampi hihna sangin sang zaw hiam?
- ③ Gospel bute in Late pulaak Messiah a tangtunna honghilh hiam? Koi bangin hih thu in Pasian Kammal thutanna honglak hiam? Bang hangin Pasian Kammal muanlahna, Ama kammal muanlahna hong guan thei thute nial ding kisam hiam?